

Kes-kes Jenayah Wanita pada Zaman Awal Islam

Prof. Madya Datin Dr. Paizah Hj. Ismail

Abstract: The article discusses the various criminal acts committed by women in the period of the early Islam: qisas, diyat, hudud and ta'zir. The discussion also covers the punishment for such cases based on the analysis of the related verses of the Qur'an and the Sunnah and the practice of the day.

Pendahuluan

Dalam tulisan ini akan dikemukakan beberapa kes jenayah yang pernah dilakukan oleh wanita pada zaman awal Islam. Tujuannya ialah untuk mengetahui sejauh mana wanita pada zaman itu terlibat dengan jenayah, sama ada jenayah *qisas* dan *diyyat*, *hudud* dan *ta'zir*, dan sejauh mana pula tindakan hukuman yang dikenakan ke atas mereka dalam jenayah-jenayah berkenaan. Sesungguhnya penelitian terhadap kes-kes seperti ini adalah penting dilakukan kerana ia boleh merupakan pentafsiran yang terdekat sekali kepada segala nas-nas yang ada baik berupa al-Qur'an ataupun al-Sunnah terutama yang melibatkan wanita sebagai subjeknya.

Kes-kes

Dalam kesalahan *qisas* dan *diyyat*, antara kes yang terkenal ialah kes pembunuhan wanita mengandung oleh seorang wanita lain dalam satu perkelahian yang menggunakan batu dan kayu. Al-Bukhari meriwayatkan dari Abu Hurayrah bahawa kedua perempuan

tersebut dari suku Hudhayl.¹ Mengikut Abu Daud, kedua mereka adalah isteri-isteri kepada seorang suami yang juga dari suku Hudhayl.² Dalam kes tersebut salah seorang dari perempuan berkenaan memukul yang satu lagi dengan batu atau kayu sehingga menyebabkan kematian perempuan yang seorang lagi itu dan anak dalam kandungannya. Apabila kes berkenaan di bawa kepada Nabi s. 'a.w., baginda memutuskan supaya perempuan yang membunuh membayar *ghurrah* atau ganti rugi atas kematian anak dalam kandungan perempuan berkenaan. Di samping itu kaum keluarganya (perempuan yang membunuh) atau dalam istilah hukum Islam disebut '*Aqilah* pula diwajibkan membayar *diyyat* kerana kematian ibu tersebut.

Satu lagi kes qisas ialah pembunuhan yang dilakukan oleh seorang perempuan sebagaimana telah disebut oleh al-Bukhari dalam satu riwayat dari al-Mughirah Ibn hakim al-San'ani dari bapanya bahawa seorang perempuan di bandar San'a' telah berlaku curang dengan seorang lelaki semasa ketiadaan suaminya. Apabila hal tersebut telah diketahui oleh anak tirinya (anak suaminya) dia berasa bimbang. Beliau lalu berkata kepada teman lelakinya bunuhlah budak itu. Pada mulanya lelaki berkenaan enggan melakukannya, tetapi akhirnya bersetuju. Turut serta dalam pakatan tersebut seorang lelaki lain dan seorang khadam (pembantu rumah) kepada perempuan tersebut. Kesemua mereka dalam satu pakatan jahat telah membunuh kanak-kanak berkenaan, dan kemudiannya memotong segala anggota budak itu serta memasukkannya ke dalam satu bekas dan mencampakkannya ke dalam perigi buta. Kes itu akhirnya telah terbongkar dan kesemua mereka telah di bawa kepada gabenor San'a, iaitu Ya'la. Gabenor berkenaan menulis surat kepada Sayyidina 'Umar Ibn al-Khattab bertanyakan pendapatnya. 'Imar menjawab dengan berkata: Bunuhlah kesemua mereka. Demi Tuhan, kalaulah kesemua penduduk San'a' berpakat membunuhnya maka kesemuanya aku akan bunuh.³

Kedua-dua kes berkenaan merupakan kes-kes utama yang sentiasa dirujuk oleh para fuqaha' dalam masalah jenayah *qisas* dan *diyyat*. Kes pertama menjadi rujukan asas bagi pembunuhan terhadap anak dalam kandungan⁴, sementara kes kedua pula menjadi rujukan asas kepada pembunuhan secara konspirasi atau pakatan jahat.⁵ Bagaimanapun, apa yang penting dalam kes ini ialah kedudukan wanita itu sendiri sebagai subjek jenayah yang dipertanggungjawabkan atas segala perbuatan jenayah yang dilakukannya sama ada secara sendiri, berkongspirasi atau seumpamanya tanpa apa-apa perbezaan dengan lelaki.

Dalam kesalahan hudud pula, antara kes-kes yang melibatkan wanita di zaman awal Islam boleh dilihat, antara lain melalui hadis-hadis sepertimana di bawah tajuk-tajuk kecil berikut:

Penzinaan

Kes yang pertama terkenal dengan nama "al-'Asif". Mengenai kes tersebut Abu Hurayrah dan Zayd Ibn Khalid meriwayatkan katanya:

"Ketika kami berada di sisi Nabi s. 'a.w. bangun seorang lelaki dan berkata: Dengan nama Allah saya memohon kepada tuan wahai Rasulullah agar memberi keputusan kepada kami berdasarkan kitab

Allah. Lepas itu bangun pula lawannya yang lebih tahu tentang hukum dan berkata: Buatlah keputusan di antara kami berdasarkan kitab Allah dan beritahulah saya mengenainya. Sabda Rasulullah s. `a.w. ceritakanlah. Kata lelaki berkenaan: Sesungguhnya anak lelaki saya bekerja sebagai pengambil upah kepada lelaki ini, dan telah berzina dengan isterinya. Maka saya ingin menebus dosanya dengan memberi seratus ekor kambing dan seorang khadam. Saya telah bertanya ramai dari kalangan ulama tentang hal ini. Mereka telah membe ritahu saya bahawa atas anak saya ialah rotan seratus kali dan buang daerah selama setahun. Manakala huku man atas isteri berkenaan pula ialah rejam sampai mati. Maka sabda Nabi s. `a.w.: "Demi Tuhan aku akan memberi keputusan antara kamu mengikut apa yang ditetapkan oleh kitab Allah. Seratus ekor kambing dan seorang khadam yang kamu tawarkan itu hendaklah dipulang balik. Sesungguhnya atas anak kamu seratus kali sebat dan buang daerah selama setahun." Sabda Nabi s. `a.w. lagi: "Pergilah kamu wahai Unays dan tanyalah perempuan berkenaan. Jika dia mengaku maka rejamlah dia." Selepas ditanya oleh Unays perempuan itu mengaku, lalu dia direjam."⁶

Kes di atas dikenali dengan kes *al-'Asif*. Dalam bahasa Arab 'Asif bererti zalim atau jahat.⁷ Orang yang mengambil upah disebut sebagai 'Asif kerana pemberi upah telah menzaliminya dengan membebarkannya dengan kerja-kerja yang tidak wajar.⁸

Kes 'Asif ini merupakan rujukan utama bagi para fuqaha' dalam menghuraikan hukum rejam ke atas penzina yang muhsan, iaitu yang sudah berkahwin dan bahawa kesalahan zina itu boleh sabit dengan pengakuan.⁹

Kes kedua mengenai seorang perempuan bernama *al-Ghamidiyyah*. Abdullah Ibn Buraydah meriwayatkan daripada bapanya dengan berkata:

"*Al-Ghamidiyyah* telah datang membuat pengakuan kepada Rasulullah s. 'a.w. dengan berkata: Sesungguhnya aku telah berzina maka bersihkanlah aku. Nabi s. 'a.w. telah menolak pengakuan itu. Pada keesokan harinya *al-Ghamidiyyah* datang lagi membuat pengakuannya dengan berkata: Ya Rasulallah, janganlah tuan menolak pengakuan saya ini sebagaimana tuan menolak pengakuan Ma'iz. Demi Allah, sesungguhnya saya sudah mengan dung. Sabda Rasulullah s. 'a.w.: Tidak, baliklah sehingga kamu selesai bersalin. Apabila selesai bersalin *al-Ghamidiyyah* datang bersama bayinya yang berbalut dengan kain dan berkata: Inilah anakku. Sesungguhnya aku sudah bersalin. Sabda Rasulullah s. 'a.w.: Baliklah dan susuilah dia sehingga tamat tempuh penyusuannya. Apabila tempoh penyusuannya tamat dan bayinya sudah boleh mengambil makanan selain dari susunya, *al-Ghamidiyyah* bersama dengan bayinya yang memegang roti pergi kepada Rasulullah s. 'a.w., dan berkata: Wahai

Nabi Allah, sesungguhnya aku sudah menamatkan tempoh penyusuannya dan sekarang dia sudah boleh makan makanan lain. Nabi s. 'a.w. mengambil bayi tersebut dan menyerahkannya kepada salah seorang sahabatnya. Kemudian baginda menyuruh para sahabatnya menanam perempuan tersebut hingga ke paras dadanya dan menyuruh mereka merejamnya. Khalid Ibn al-Walid adalah salah seorang yang merejam perempuan tersebut. Apabila Khalid melempar batu ke arah kepala perempuan berkenaan, darahnya terpercik ke muka Khalid. Dia lalu memaki perempuan itu. Makian itu telah didengar oleh Rasulullah s. 'a.w. lalu baginda bersabda kepadanya: Ingat wahai Khalid, demi Tuhan, sesungguhnya dia sudah bertaubat. Kemudian, Nabi s. 'a.w. menyuruh supaya dia disembahyang dan dikebumikan”¹⁰

Dalam satu riwayat lain ‘Imran Ibn Husayn menyebut bahawa seorang dari Juhaynah telah datang kepada Rasulullah s. `a.w. dalam keadaan sedang mengandung hasil dari perbuatan zina. Dia berkata kepada Rasulullah s. `a.w.: “Aku telah terlibat dengan satu kesalahan hudud. Maka laksanakanlah hukuman ke atasku”. Nabi s. `a.w. pun memanggil walinya dan berkata: “Berbuat baiklah kepadanya dan apabila dia sudah melahirkan anaknya maka bawalah dia ke mari”. Sesudah selesai segala-galanya Rasulullah s. `a.w. menyuruh supaya diikat pakaiannya dengan kemas untuk dilaksanakan hukuman rejam ke atasnya. Selepas dia direjam Nabi menyembahyangkan jenazahnya. Apabila ‘Umar melihat perbuatan Nabi tersebut, beliau berkata: “Wahai Rasulullah, dia telah berzina”. Sabda Nabi s. `a.w.: “Sesungguhnya dia sudah bertaubat. Sekiranya taubatnya itu dibahagikan kepada tujuh puluh penduduk Madinah, ia masih mencukupi. Apakah engkau pernah dapat sesuatu yang lebih baik dari dia yang telah memperelokkan dirinya kerana Allah s.w.t.” Hadis riwayat Abu Daud.¹¹

Kedua-dua riwayat mengenai kes yang sama. Menurut al-Syawkani, al-Ghamidiyyah dan perempuan dari Juhaynah itu sebenarnya orang yang sama. Kerana perkataan *al-Ghamidi* adalah gelaran kepada seorang lelaki yang menjadi ketua kepada suku Juhaynah.¹²

Riwayat pertama berkenaan digunakan oleh para fuqaha’ sebagai rujukan kepada hukum menangguhkan pelaksanaan hukuman rejam ke atas penzina yang mengandung sehingga dia melahirkan anak. Sementara riwayat kedua pula dirujuk sebagai dalil kepada hukum memastikan aurat perempuan tidak terdedah ketika melaksanakan hukuman rejam.¹³

Satu lagi kes perempuan berzina yang berlaku di zaman Nabi s. `a.w. ialah sepertimana yang diriwayatkan oleh ‘Ali r. `a. dengan katanya:

“Sesungguhnya seorang hamba perempuan kepada Rasulullah s. 'a.w. telah berzina. Maka, Nabi memerintahkan supaya dilaksanakan sebat ke atasnya. Apabila aku pergi mendapatkannya aku dapati dia masih berada dalam nifas. Maka aku berasa bimbang untuk melaksanakan sebat ke atasnya kerana ditakuti dia akan mati. Lalu aku mem-

beritahu Rasulullah s. 'a.w. tentang perkara itu. Nabi s. 'a.w. bersabda: Engkau telah bertindak dengan betul. Tunggulah sehingga dinasihati dan selesai nifasnya." (Hadis riwayat Muslim dan Abu Daud) ¹⁴

Hadis di atas dirujuk oleh para fuqaha' sebagai dalil utama kepada hukum wajib menanggukkan pelaksanaan hudud atas orang sakit yang mempunyai harapan untuk sembuh sehingga dia betul-betul sembuh. ¹⁵

Satu lagi kes zina yang berlaku pada zaman awal Islam ialah sebagaimana telah diriwayatkan oleh al-Imam Malik bahawa sayyidina 'Umar Ibn al-Khattab sewaktu berada di Syam telah didatangi oleh seorang lelaki dan memberitahunya bahawa isterinya telah berzina dengan lelaki lain. Maka 'Umar telah menghantar Abu Waqid al-Laythi menemui isteri berkenaan bertanyakan hal tersebut. Sewaktu didatangi oleh Abu Waqid, terdapat beberapa orang perempuan bersama perempuan tersebut. Lalu Abu Waqid memberitahunya apa yang dikatakan oleh suaminya kepada 'Umar. Dia juga diberitahu bahawa dia tidak akan dihukum dengan semata-mata tuduhan suaminya itu. Abu Waqid cuba menimbulkan beberapa keraguan supaya tertuduh tidak membuat pengakuan atau membenarkan segala tuduhan ke atasnya itu. Namun usahanya tidak berjaya. Perempuan itu sebaliknya mengaku benar segala tuduhan yang dibuat oleh suami beliau ke atasnya. Dengan pengakuan itu, 'Umar memerintahkan supaya dia direjam. ¹⁶

Pada zaman pemerintahan 'Umar juga ada diriwayatkan bahawa beliau pernah memerintah Ibn Abi Rabi'ah al-Makhzumi menyekat seorang hamba perempuan sebanyak lima puluh kali kerana berzina. ¹⁷

Begitu juga sayyidina 'Ali r. 'a. pernah merejam seorang perempuan yang bernama Syurahah al-Hamdaniyyah kerana berzina.

2. Mencuri

Mengikut al-Qurtubi,¹⁸ perempuan yang mula-mula sekali dikenakan hukuman had kerana mencuri ialah Murrah binti Sufyan Ibn 'Abd al-Asad dari suku Bani Makhzum. Beliau juga dikenali dengan Ummu 'Amru.

Bagaimanapun mengikut al-'Asqalani, kes yang pertama melibatkan Fatimah binti al-Aswad Ibn 'Abd al-Asad al-Makhzumi. Pada pendapat beliau, kes Murrah atau Ummu 'Amru ialah kes kedua yang berlaku dua tahun terlewat dari kes Fatimah al-Makhzumiyyah. ¹⁹

Mengikut riwayat al-Bukhari, 'Aisyah Umm al-Mukminin menyebut bahawa seorang perempuan dari suku Bani Makhzum telah mencuri. Menyedari hukuman yang sangat memalukan yang agak pasti akan dikenakan ke atas perempuan bangsawan itu, orang-orang Quraysy telah menggunakan Usamah yang memang diketahui sebagai seorang yang dikenali oleh Rasulullah s. 'a.w. itu sebagai orang tengah dalam usaha untuk melepaskan perempuan berkenaan dari hukuman. Rasulullah s. 'a.w. menegur Usamah kerana menerima peranan seperti itu dan menegaskan kepada orang ramai melalui satu

ucapan baginda bahawa usaha seperti itulah yang menyesatkan orang-orang terdahulu. Bersempena dengan itu juga Rasulullah s. a. w. menegaskan bahawa hukuman tetap akan dijalankan juga walaupun sekiranya yang terlibat mencuri itu ialah Fatimah anak baginda sendiri.²⁰

Hadis di atas disebut oleh para fuqaha' sebagai dalil utama hukum haram percubaan mengelak penjenayah dari dikenakan hukuman sesudah kes berkenaan di bawa ke pengetahuan pemerintah. Di samping hadis-hadis berkenaan ada hadis-hadis lain lagi. Antaranya yang menyifatkan perbuatan menghalang pelaksanaan hudud sebagai menyanggah perintah Allah.²¹

3. Murtad

Al-Daruqutni dan al-Bayhaqi meriwayatkan dari Jabir tentang seorang perempuan yang bernama Ummu Marawan telah murtad. Rasulullah menyuruh orang memberitahunya supaya bertaubat ataupun akan dibunuh. Mengikut riwayat berkenaan lagi perempuan tersebut enggan kembali kepada Islam. Lalu dengan kerana itu dia dibunuh.²²

Mengikut al-Bayhaqi, berdasarkan riwayat 'Aisyah kejadian itu berlaku dalam peperangan Uhud. Bagaimanapun riwayat berkenaan hanya benyebut "seorang perempuan" sahaja tanpa menyebut nama berkenaan.²³

Dalam satu riwayat lain yang juga disebut oleh al-Daruqutni dan al-Bayhaqi, sayyidina Abu Bakar pernah menangani kes perempuan murtad. Mengikut riwayat berkenaan perempuan yang dimaksudkan ialah Umm Qurfah. Beliau tidak mahu bertaubat, dan oleh kerana itu beliau dibunuh.²⁴

Para fuqaha' menyebut hadis-hadis berkenaan sebagai dalil-dalil asas terhadap hukuman ke atas orang murtad.²⁵ Malah mengikut Ibn Qudamah,²⁶ hadis-hadis berkenaan adalah asas kepada pandangan bahawa dalam masalah murtad, perempuan tidak berbeza dari lelaki, tidak seperti difahami oleh sesetengah kalangan fuqaha'.

Demikian kes-kes jenayah yang melibatkan wanita pada zaman permulaan Islam. Sebagaimana jelas ianya merupakan kes-kes jenayah membunuh dan jenayah-jenayah zina, mencuri dan murtad. Tidak ada kes-kes hudud lain yang dilaporkan dan tidak ada juga kes-kes *ta'zir*. Begitupun ada kemungkinan bahawa kes-kes seperti itu tidak ada pengaruh secara langsung dalam pembinaan hukum, lalu tidak mendapat perhatian dari para periwayat. Suatu hal yang agak ketara dalam riwayat-riwayat berkenaan ialah bahawa kes zina merupakan kes yang terbanyak sekali diriwayatkan. Ini mungkin kerana jenayah seperti itulah yang kerap berlaku di kalangan mereka. Antara satu sebab lain ialah kerana tabiat zina itu sendiri melibatkan perempuan. Mungkin juga, sebagaimana kata para ulama, wanita lebih banyak terdedah kepada jenayah perzinaan dari jenayah-jenayah lain.²⁷

NOTA HUJUNG

1. Al-'Asqalani, *Fath al-Bari*, Beirut, Dar al-Fikr, 1993, J. 14, hal. 248.
2. Abu Daud, *Sunan*, Beirut, Muassasat al-Kutub al-Thaqafiyah, 1988, J. 2, hal. 599.
3. Al-'Asqalani, *op.cit.*, J. 14, hal. 217.
4. Al-Syawkani, *Nayl al-Awtar*, J. 7, ms. 227.
5. Al-'Asqalani, *op.cit.*, J. 14, hal. 216.
6. Al-'Asqalani, *Ibid.*, J. 14, ms. 100.
7. Ibn Manzur, *Lisan al-'Arab*, Beirut, Dar al-Fikr, 1990.
8. Lihat tafsiran mengenai dalam: al-Syakani, *op.cit.*, J. 7, hal. 250.
9. *Ibid.*, hal 249.
10. Al-Nawawi, *Sahih Muslim Bi Syarh al-Imam al-Nawawi*, Kaheerah, Dar al-Fikr, 1983, J. 6, ms. 203-204.
11. Abu Daud. *op.cit.*, J. 2, hal 556.
12. Al-Syawkani, *op.cit.*, J. 7, hal. 281.
13. *Ibid.*, hal-hal. 280-281.
14. Al-Nawawi, *op.cit.* J. 6, hal. 214, Abu Daud, *op.cit.*, J. 2, hal. 566.
15. Lihat al-Syawkani, *op.cit.*, J. 7, hal. 283.
16. 'Abd al-Rahman al-Sayuti, *Tanwir al-Hawalik Syarh 'Ala Muwatta' Malik*, Beirut, al-Maktabah al-Thaqafiyah, 1984, J. 3, hal. 42.
17. *Ibid.*, hal. 44.
18. Al-'Asqalani, *op.cit.*, J. 14, hal. 77.
19. Al-Qurtubi, *al-Jami' Li Ahkam al-Quran*, Kaheerah, 1956, J. 6, hal. 160.
20. Al-'Asqalani, *op.cit.*, J. 14, hal-hal. 40-41.
21. Hadis riwayat al-Bukhari, *Ibid*, hal. 39.
22. Al-San'ani, *op.cit.*, J. 4, hal. 21.
23. Al-Syawkani, *op. cit.*, J. 8. hal. 3.
24. *Ibid.*
25. *Ibid.*
26. *Ibid.*, hal-hal. 2-3.
27. Ibn Qudamah, *al-Mughni*, Kaheerah, Maktabah al-Qaheerah, 1969, J. 9, hal. 4.